

# DESCRIPTION DE DITHMARCHE.

**D**ithmarche située entre les fleuves l'Albe, & l'Eider, à pour limites vers Occident, la Mer Océane, vers Orient le pays d'Holsate. Le terroir est fertile & riche de bestail, poisson, lacs & marex. Il y a des prairies & pasturages bien fécondes, & champs labourables tres fertiles. Les paisans y sont riches, mais lourds, forts & robustes. Il n'y a ne ville ne chasteau, mais excellents bourgades & villages, desquels Meldorp est le principal. Puis Heyde, qui est le lieu ordinaire du Conseil & Court de la Province ou les sentences se prononcent selon les loix & costumes de la patrie. En ce lieu est chasque semaine une soyre, ou les marchandises & biens de terre du pays s'apportent, & se mettent à vente.

Ceste province (comme les Histoires témoignent) fut subiecte passé quatre cens ans à la Seigneurie de Breme, & de Stade. Les Officiers desquels furent par ceux de Dithmarche les aucuns tuez par finesse, les autres chascez avec toute la noblesse, ainsi vendicans leur propre liberté. Or comme Hartvic Euesque de Breme les pressa par guerre, ils furent contraints de se joindre au Royaume de Danemarck, & volontairement eux submettre à la Seigneurie de Waldemar Euesque de Slesuic, & se sont faitz suiets, ou (comme dict Albert Crantz) confederex aux Danois. Les Dithmarchois furent semblablement domptez par Henry Lyon Duc de Saxe: mais luy estant mis au ban de l'Empereur Frederic second du nom, Waldemar Roy de Danemarck eut derechef la possession de Dithmarche, l'an de grace 1226. La cité de Lubec ayant impetrée de l'Empereur Frederic second, la liberté du iour Danois, auquel par contraincte elle s'estoit soumise, & qu'elle estoit derechef par l'Empereur mis en estat de ville Imperiale, ainsi qu'elle estoit au temps de Frederic premier son ayeul, & qu'à ceste fin fut prins le Chasteau qui des Danois fut gardé dedens la ville: ledict Roy Waldemar, ayant assemblé ses forces, & son armée, en laquelle estoient ceux de Dithmarche, comme ses suiets, la fait marcher vers Lubec avec intention de gagner la ville. Ceux de Lubec, qui par consentement de l'Empereur estoient confederex à plusieurs Princes leurs voisins, mais cherēt à l'encontre du Roy, en compagnie de Girard Archeuesque du Breme, Albert Duc de Saxe, Henry Conte de Suerin, & Adolphe de Scanenbourg: lesquels ioinnans leurs forces ensemble, ont deffait le Roy aux Landes pres de Bornhouet, le iour de la Magdalaine, de l'an 1226. Les Dithmarchois quittans en ceste bataille, la party du Roy, se sont ioinctz à l'ennemy: & ont depuis recognu l'Archeuesque de Breme pour Seigneur, combien qu'ils ne luy ont obey, n'y aussi payé le droict de ses domaines.

Les Contes d'Holsate ont plusieurs fois fait la guerre aux Dithmarchois, neantmoins sans aucun profit. Chrestien premier du nom Roy de Danemarck, impetra de l'Empereur Frederic troisieme, que de trois Seigneuries, à sçavoir, Holsate, Stormar & Dithmarche, seroit erigé un Duché, lequel il receut à fief perpetuel confirmé par lettres de l'Empereur. Cestuy-cy conuoqua, l'an de grace 1480, la diete d'Holsate, à laquelle il fit exhiber, & publiquement prelire, aux Dithmarchois les tres Imperiales, requerant qu'obeissans à icelles se voudroyent associer en un corps de Duché, avec l'Holsate & Stormar: & le reconnoistre pour leur Duc. Les Dithmarchois respondent que l'Empereur n'estant point assezt instruit auoit disposé des biens d'autrui: que pour lors ils auoyent un Seigneur l'Archeuesque de Breme, depuis la mort du dernier Conte de Dithmarche. Le Roy commanda de repliquer, que de puis ce temps la ils auoyent souuent changez de Seigneur, & qu'ils auoyent aucunes fois obey au Roy Waldemar second, au tresfois au Conte d'Holsate, & ores se pretendoit tant serlement quelque espece de Seigneurie de l'Archeuesque de Breme, veu que de faitz ils ne luy estoient obeissans. Eux au contraire, respondent autres fois: Qu'ils auoyent en leur Province les Officiers de l'Archeuesque, témoigns d'une iuste Seigneurie, & que de leur viuant, iamais ne souffriront qu'ils soyent de luy alienez. Peu de temps apres le Roy trespassa à Coppenhaue, l'an de grace 1481. Mais son fils les assailly avec grande armée, l'an 1500, on la victoire demeura au Dithmarchois. Car le Roy estant mis en route, une grande partie de la noblesse d'Holsate, vaillamment combatant, y fut occise. Finalement par deuostre salut 1559, Frederic second du nom (qui en la mesme année, apres la mort de son Pere Chrestien troisieme fut couronné Roy) Iean & Adolphe Ducs de Holsate, apres auoir assemblez grande armée, ont pressez, contraints, & subinguez les Dithmarchois. Le chef de ceste expedition fut le Seigneur Iean Rantzou, Cheualier, homme prudent, & experimenté es choses militaires, & magnanime. A la premiere entrée ils ont occupés Meldorp, & toute la contree Australe, puis Heyde: ou ceux de Dithmarche, sortissans de Hemminga, leur vindrent à rencôtrer, mais furent deffaitz, avec la perte de trois mille paisans. En ceste meslée, fut blest le Duc Adolphe, le 13. iour de Iuillet, en l'an 1559, & furent par ce moyen reduits à obeissance. De ces affaires on peut lire Ierosme Hoste de la guerre de Dithmarche, & un autre liure sans nom de l'Auteur, imprimé à Basle, & plusieurs autres.

En la presente Carte, le bening Lecteur, peut veoir, comment l'Albe, l'un des trois principaux fleuves d'Allemagne, descend de Bobeme, par le pays de Saxe, & se discharge en la mer. Sur ceste riuere, dix huit lieues de la mer, est située la renommée ville marchande de Hambourg: & douze lieues de la mer est assise l'ancienne ville de la societé Tudesque, à sçavoir Stade. On y voit aussi le fleuve le Weser, sur lequel est assise la ville de Breme qui est siege Episcopal.